

四庫全書

史部

欽定四庫全書

水經注釋卷三十五

仁和趙一清撰

江水三

又東至華容縣西夏水出焉

江水左迤為中夏水右則中郎浦出焉江浦右迤南
派屈西極水曲之地勢世謂之江曲者也

又東南當華容縣南涌水入焉

江水又東涌水注之水自夏水南通於江二水之間
謂之涌口春秋左氏傳所謂閫敖遊涌而逸者也江
水又逕南平郡孱陵縣之樂鄉城北吳陸抗所築後
王濬攻之獲吳水軍督陸景於此渚也

又東南油水從東南來注之

又東右合油口又東逕公安縣北劉備之奔江陵使
築而鎮之曹公聞孫權以荊州借備臨書落筆杜預
克定江南罷華容置之

一清按此處脫誤甚多不可強通

謂之江安

縣南郡治吳以華容之南鄉為南郡晉太康元年改
曰南平也縣有油水水東有景口口即武陵郡界景
口東有淪口淪水南與景水合又南通澧水及諸陂
湖自此淵池相接悉是南蠻府屯也故側江有大城
相承云倉儲城即郎閣也江水左會高口江浦也右
對黃州一清按寰宇記云公安縣有黃山字或作皇
昔人呼為睢山今或呼為玉山黃州蓋以山
得名江水又東得故市口水與高水通也江水又右逕
楊岐山北山枕大江山東有城故華容縣尉舊治也

大江又東左合子夏口江水左迤北出通於夏水故
曰子夏也大江又東左得侯臺水口江浦也大江右
得龍穴水口江浦右迤也北對虎州又州北有龍巢
地名也昔禹南濟江黃龍夾舟舟人失色無主禹笑
曰吾受命于天竭力養民生性也死命也何憂龍哉
於是二龍弭鱗掉尾而去焉故水地取名矣江水自
龍巢而東得俞口夏水泛盛則有冬無之江之北岸
上有小城故監利縣尉治也又東得清揚土塢二口

江浦也大江右逕石首山北又東逕赭要赭要州名
在大江中次北湖州下江水左得飯筐上口秋夏水
通下口間相距三十餘里赭要下即楊子州在大江
中二州之間常苦蛟害昔荆飲飛濟此遇兩蛟斬之
自後罕有所患矣江之右岸則清水口口上即錢官
也水自牛皮山東北通江北對清水州州下接生江
州南即生江口水南通澧浦江水右會飯筐下口江
浦所入也江水又右得上檀浦江澹也江水又東逕

竹町南江中有觀洋澁澁東有大州州東分為爵州
州南對湘江口也

又東至長沙下雋縣北澧水沅水資水合東流注之
凡此諸水皆注於洞庭之陂是乃湘水非江川也
湘水從南來注之

江水右會湘水所謂江水會者也江水又東左得二
夏浦俗謂之西江口又東逕忌置山南山東即隱口
浦矣江之右岸有城陵山山有故城東接微落山亦

曰暉落巖江之南畔名黃金瀨瀨東有黃金浦良父
口夏浦也又東逕彭城口水東有彭城巖故水受其
名卽玉澗水出巴丘縣東玉山玉溪北流注於江江
水自彭城巖東逕如山北北對隱巖二巖之間大江
之中有獨石孤立大江中山東江浦世謂之白馬口
江水又左逕白螺山南右歷鴨蘭巖北江中山也東
得鴨蘭冶浦二口夏浦也江水左逕上烏林南村居
地名也又東逕烏黎口江浦也卽中烏林矣又東逕

下烏林南吳黃蓋敗魏武于烏林即是處也江水又東左得子練口北通練浦又東合練口江浦也南直練州練名所以生也江之右岸得蒲磯口即陸口也水出下雋縣西三山溪其水東逕陸城北又東逕下雋縣南故長沙舊縣王莽之閔雋也宋元嘉十六年割隸巴陵郡陸水又屈而西北流又逕其縣北北對金城吳將陸渙所屯也陸水又入蒲圻縣北逕呂蒙城西昔孫權征長沙零桂所鎮也陸水又逕蒲磯山

北入大江謂之刀環口又東逕蒲巖山北對蒲圻州
亦曰擎州又曰南州州頭即蒲圻縣治也晉太康元
年置州有白面州州南又有潁口水出豫章艾縣東
入蒲圻縣至沙陽西北魚嶽山入江山在大江中楊
子州南孤峙中州江水左得中陽水口又東得白沙
口一名沙屯即麻屯口也本名蔑默口江浦矣南直
蒲圻州水北入百餘里吳所屯也又逕魚嶽山北下
得金梁州州東北對淵州一名淵步州江濱從州頭

以上悉壁立無岸歷專岐至白沙方有浦上甚難江
中有沙陽州沙陽縣治也縣本江夏之沙羨矣晉太
康中改曰沙陽縣宋元嘉十六年割隸巴陵郡江之
右岸有雍口亦謂之港口東北流注長洋港又東北
流逕石子岡岡上有故城卽州陵縣之故城也莊辛
所言左州侯國矣又東逕州陵新治南王莽之江夏
也港水東南流注於江謂之洋口南對龍穴州沙陽
州之下尾也州裏有駕部口宋景平二年迎文帝于

江陵法駕頓此因以為名文帝車駕發江陵至此黑
龍躍出負帝所乘舟左右失色上謂長史王曇首曰
乃夏禹所以受天命矣我何德以堪之故有龍穴之
名焉江水又東右得瀘口江浦也右對瀘州江水左
逕百人山南右逕赤壁山北昔周瑜與黃蓋詐魏武
大軍處所也江水東逕大軍山南山東有山屯夏浦
江水左迤也江中有石浮出謂之節度石右則塗水
注之水出江州武昌郡武昌縣泰山

一清按寰宇記
鄂州江夏縣下

云金水在縣南九十里出金山西注大江舊記云有金雞從雞翅山南飛產金于此故名蓋山水之殊目矣方輿紀要云塗水一名金水荆湘記金水北岸有汝南舊城是也西北流逕汝南僑

郡故城南咸和中寇難南逼戶口南渡因置斯郡治于塗口塗水歷縣西又西北流注於江江水又東逕小軍山南臨側江津東有小軍浦江水又東逕雞翅山北山東即土城浦也

又東北至江夏沙羨縣西北沔水從北來注之沔水上承沔陽縣之太白湖東南流為沔水逕沔陽

縣南注於江謂之沌口有

一清按有下落一字晉書陶侃傳侃率周訪進軍入

湘使都尉楊舉為先驅擊杜弢大破之而不言地名時侃屯沌口明年徙林嶂即臨嶂矣顧祖禹曰臨嶂即沔陽是也胡三省曰沔陽梁武帝時方置郡據沈約志陶侃為荊州刺史初治沔陽則是時已有沔陽城矣當屬竟陵郡界宋白曰復州沔陽縣漢縣也郡國志曰沔陽縣即楚王城又晉惠帝元康九年分江夏西部都尉置竟陵郡治石城此都尉疑即江夏西部後易稱沔陽者也陽都尉治晉水

嘉六年王敦以陶侃為荊州鎮此明年徙林嶂江水

又東逕歎父山南對歎州亦曰炭步矣江之右岸當

鸚鵡州南有江水右逕謂之驛渚三月以來水下通

樊口水江水又東逕魯山南古翼際山也地說曰漢
與江合於衡北翼際山傍者也山上有吳江夏太守
陸渙所治城蓋取二水之名地理志曰夏水過郡入

江故曰江夏也舊治安陸漢高帝六年置吳乃徙此
城中有晉征南將軍荊州刺史胡奮碑又有平南將

軍王世將刻石記征杜曾事

全氏曰按征杜
曾者是王廙

有劉琦

墓及廟也山左即沔水口矣沔左有却月城亦曰偃
月壘戴監軍築故曲陵縣也後乃沙羨縣治也昔魏

將黃祖所守

全氏曰劉表之將黃祖領江夏太守孫權禽之曹操得荊州祖骨朽久矣一清

按道元蓋襲用盛宏之荊州記之文而誤

遣董襲凌統攻而禽之禰衡亦

遇害於此衡恃才倜儻肆狂狷於無妄之世保身不

足遇非其死可謂咎悔之深矣江之右岸有船官浦

歷黃鵠磯西而南矣直鸚鵡州之下尾江水澦洄洑

浦是曰黃軍浦昔吳將黃蓋軍師所屯故浦得其名

亦商舟之所會矣船官浦東即黃鵠山林澗甚美譙

郡戴仲若野服居之

庾林曰宋書戴顓字仲若譙郡鉅人衡陽王義季鎮京口長史

張邵與顥姻通迎來上黃鵠山山北有竹林精舍林澗甚美顥憇此澗義季亟從之遊太祖每欲見之嘗謂張數曰吾東巡日當讎戴公山也按此山下謂之則仲若所住黃鵠乃京口之山鄺氏誤矣

黃鵠岸岸下有灣目之為黃鵠灣黃鵠山東北對夏

口城魏黃初二年孫權所築也依山傍江開勢明遠

憑墉藉阻高觀枕流

一清按高觀山名也亦曰高冠山在武昌縣城東南五里上

則遊目流川下則激浪崎嶇實舟人之所艱也對岸

則入沔津故城以夏口為名亦沙羨縣治也江水左

得湖口水通太白湖又東合澚口水上承沔水

方輿紀要

曰瀉水本潁水分
流注誤潁為沔

於安陸縣而東逕瀉陽縣北東流

注於江江水又東湖水自北南注謂之嘉吳江右岸
頻得二夏浦北對東城州西浦側有雍伏戍江之左
岸東會龍驤水口出北山蠻中江之右岸得武口水
上通安陸之延頭宋元嘉二年衛將軍荊州刺史謝
晦阻兵上流為征北檀道濟所敗走奔于此為戍主
光順之所執處也南至武城俱入大江南直武州州
南對楊桂水口江水南出也通金女大文姚班三治

吳舊屯所在荊州界盡此江水東逕若城南庾仲雍
江記曰若城至武城口三十里者也南對郭口夏浦
而不常泛矣東得苦菜夏浦浦東有苦菜口夏江逕
其北故蒲有苦菜之名焉山上有菜苦可食江水左
得廣武口江蒲也江之右岸有李姥浦浦中偏無蚊
蚋之患矣北對崢嶸州冠軍將軍劉毅破桓元於此
州元乃挾天子西走江陵矣

又東過邾縣南

江水東逕白虎巖北山臨側江墳又東會赤溪夏浦
浦口江水右迤也又東逕貝巖北庾仲雍謂之沛岸
矣江之右岸有秋口江浦也又東得烏石水出烏石
山南流注於江江水右得黎巖北亦曰黎岸也山東
有夏浦又東逕上磧北山名也仲雍謂之大小竹磧
也北岸烽火州即舉州也北對舉州仲雍作莒字得
其音而忘其字非也舉水出龜頭山西北流逕龍戍

南

一清按方輿紀要黃州府麻城縣舉水下引水經注云舉水西北流逕蒙龍城南南史梁宗室安成

王秀傳云司州叛蠻田魯生魯賢秀超據蒙籠來降
魏書地形志南定州蕭衍置治蒙籠城注有脫誤

梁定州治蠻田超秀為刺史舉水又西流左合垂山
之水水北出垂山之陽與弋陽淠水同發一山故是
水合之水之東有南口戍又南逕方山戍西西流注
於舉水又西南逕梁司豫二州東蠻田魯生為刺史
治湖陂城亦謂之水城也舉水又西南逕顏城南又
西南逕齊安郡西倒水注之水出黃武山南逕白沙
戍西又東南逕梁達城戍西東南合舉水舉水又東

南歷赤亭下又謂之赤亭水又分為二水南流注於江謂之舉口南對舉州春秋左傳定公四年吳楚陣于柘舉京相璠曰漢東地矣江夏有沮水或作舉疑即此也左水東南流入於江潁曰文方口江之右岸有鳳鳴口江浦也浦側有鳳鳴戍江水又東逕邾縣故城南楚宣王滅邾徙居于此故曰邾也漢高帝元年項羽封吳芮為衡山王都此晉咸和中庾翼為西陽太守分江夏立四年豫州刺史毛寶西陽太守樊

俊共鎮之為石虎將張格度所陷自爾丘墟焉城南對蘆州舊吳時築客舍於州上方便唯所止焉亦謂之羅州矣

鄂縣北

江水右得樊口庾仲雍江記云谷里袁口江津南入歷樊山上下三百里通新興馬頭二治樊口之北有灣昔孫權裴大船名之曰長安亦曰大舶載生直之士三千人與羣臣泛舟江津屬值風起權欲西取蘆州谷利不從乃拔刀急上令取樊口薄舶船至岸而敗故名其處為敗舶灣因鑿樊山

為路以上人即名其處為吳造峴在樊口上一里今
厥處尚存江水又左逕赤鼻山南山臨側江川又東
逕西陽郡南郡治即西陽縣也晉書地道記以為弦
子國也右岸有鄂縣故城舊樊楚地世本稱熊渠封
其中子之名某者為鄂王

朱氏謀瑋箋曰史記
楚世家為中子紅

晉太

康地記以為東鄂矣九州記曰鄂今武昌也孫權以
魏黃初元年自公安徙此改曰武昌縣鄂縣徙治于
袁山東又以其年立為江夏郡分建業之民千家以

蓋之至黃龍元年權遷都建業以陸遜輔太子鎮武昌孫皓亦都之皓還東令滕牧守之晉惠帝永平中始置江州傅綜為刺史治此城後太尉庾亮之所鎮也今武昌郡治城南有袁山即樊山也武昌記曰樊口南有大姥廟孫權嘗獵于山下依夕見一姥問權獵何所得曰正得一豹母曰何不豎豹尾忽然不見應劭漢官序曰豹尾過後執金吾罷屯解圍天子鹵簿中後屬車施豹尾於道路豹尾之內為省中蓋權

事應在此故為立廟也又孫皓亦嘗登之使將害常侍王蕃而以其首虎爭之北背大江江上有釣臺權嘗極飲其上曰墮臺醉乃已張昭盡言處城西有郊壇權告天即位於此顧謂公卿曰魯子敬嘗言此可謂明于事勢矣城東故城言漢將灌嬰所築也江中有節度石三段廣百步高五六丈是西陽武昌界分江于斯石也又東得五丈浦又東得次浦江浦也東逕五嶷北有五山沿次江陰故得是名矣仲雍謂之

五圻江水左則巴水注之水出雩婁縣之下靈山即大別山也與決水同出一山故世謂之分水山亦或曰巴山南歷蠻中吳時舊立屯於水側引巴水以溉野又南逕巴水戍南流注於江謂之巴口又東逕軹

縣故城南故弦國也

全氏曰此是漢志語而前西陽郡下又引王隱晉書地道記是

為複

春秋僖公五年秋楚滅弦弦子奔黃者也漢惠

帝元年封長沙相利倉

沈氏曰漢表作黎朱倉此從史表

為侯國城

在山之陽南對五州也江中有五州相接故以五州

為名宋孝武帝舉兵江州建牙州上有紫雲蔭之即

是州也東會希口水出潯縣霍山西麓山北有潯

縣故城地理志曰縣南有天柱山即霍山也有祠南

嶽廟音潛

譚氏元春曰二字恐非正文一清按友夏之言是也二字注中注漢志注晉灼曰音

潛齊立霍州治此西南流分為二水枝津出焉希水

又南積而為湖謂之希湖湖水又南流逕軹縣東而

南流注於江是曰希口水者也然水流急濬霖雨暴

疾漂濫無常行者難之大江右岸有厭里口安樂浦

從此至武昌尚方作部諸屯相接枕帶長江又東得

棄步步下有章浦本南陽郡治

全氏曰此地安得為南陽郡治或因下南

陽山而謠先宗伯公曰當作西陽郡治是也

今悉荒蕪江水左得赤水浦

夏浦也江水又東逕南陽山南又曰芍磯亦曰南陽

磯仲雍謂之南陽圻一名洛至圻一名石姥水勢迅

急江水又東逕西陵縣故城南史記秦昭王遣白起

伐楚取西陵者也漢章帝建初二年封陰棠為侯國

江水東歷孟家澹江之右岸有黃石山水逕其北即

黃石巖也一名石茨圻有西陵縣治也縣北則三州也山連徑江側東山偏高謂之西塞東對黃公九巖所謂九圻者也於行小難兩山之間為闕塞也從此濟於土瀆土瀆者北岸地名也

一清按方輿紀要興國州大治縣西塞山

北即道士洑也亦名土洑則土瀆者即土洑也洑與瀆通用

又東過蘄春縣南蘄水從北來注之

江水右得葦口江浦也浦東有葦山江水東逕山北北崖有東湖口江波左迤流結成湖故謂之湖口矣

江水又東得空石口江浦在右臨江有空石山南對石穴州州上有蘄陽縣治也又東蘄水注之江水又東逕蘄春縣故城南世祖建武三十年封陳俊子浮為侯國也江水又東得銅零口江浦也大江右逕蝦蟇山北而東會海口水南通大湖北達於江水左右翼山江水逕其北東合臧口江浦矣江水又左逕長風山南得長風口江浦也江水又東逕積布山南俗謂之積布巖又曰積布圻庾仲雍所謂高山也此即

西陽尋陽二郡界也右岸有土瀘口江浦也夾浦有

江山山東口有護江浦庾仲雍謂之朝二浦也

全氏曰朝

二浦先宗伯公手校本作朝江浦即上護江浦之義

又東過下雉縣北利水從東陵西南注之

江水東逕琵琶山山下有琵琶灣也又東逕望夫山南又東得苦菜水口夏浦也江之右岸富水注之水出陽新縣之青湓山西北流逕陽新縣故豫章之屬縣矣地多女鳥元中記曰新陽男子於水次得之

遂與共居生二女悉衣羽而去豫章間養兒不露其衣言是鳥落塵於兒衣中則令兒病故亦謂之夜飛

遊女矣

一清按方輿紀要興國州永興廢縣下云本漢鄂縣及下雒縣地孫吳初為武昌縣地尋

析武昌縣南境置陽新縣屬武昌郡晉以後因之隋改曰富川縣今猶謂之陽新里晉書地理志陽新屬武昌不屬豫章然吳書呂蒙傳云以尋陽陽新為奉邑意者先屬豫章後度武昌乎且晉志又無新陽之名宋書州郡志竟陵太守屬有新陽男相殆是永初以後所置是注上云陽新下云新陽而所引毛女事搜神記作豫章新淦人則是又與陽新新陽俱無當也

又西北逕下雒縣王莽

更名之潤光矣後併新陽

全氏曰孫吳析下雒置陽新未嘗并下雒入新陽也

水之左右公私裂溉咸成沃壤舊吳屯所在也江水
又東右得蘭溪水口並江浦也又東左得青林口江
水左傍青林湖即利水出廬江郡之東陵鄉江夏有

西陵縣故是言東矣尚書云江水過九江至于東陵

者也

全氏曰按此則善長不以洞庭為九江以是知
第四十卷九江在長沙下雋之文非本經所有

如以為經注互異耶則彼
文善長何無一語糾正之

西南流水積為湖湖西有

青林山宋太始元年明帝遣沈攸之西伐子勛伐柵

青山觀一童子甚問伐者曰取此何為答欲討賊童

子曰下句當平何勞伐此在衆人之中忽不復見故
謂之青林湖湖有鯽魚食之肥美辟寒暑湖水西流
謂之青林水又西南歷尋陽分為二水一水東流通
大雷一水西南流注于江經所謂利水也右對馬頭
岸自富口迄此五十餘里岸阻江山

何氏曰此下注文總見二十八

卷沔水南江下又曰三卷述大江源委即當繼以沔水蓋沔即漢江漢同朝宗于海不可得而隔越也一清按義門之言非也沔水篇兼叙北江南江江水篇專叙中江豈可合也禹貢雖指曰水經江水自下馬以東所紀山水地名或瑣細難考沔水自石城以東尤多舛錯道元亦自謂未必一得其實今據府州縣

志附載其下水經注江水自西塞山又東逕蘄春縣
故城南又東逕積布山南又東逕下雒縣北又東左
得青林口水出廬江郡之東陵鄉尚書云江水過九
江至于東陵者也又東逕瑞昌縣北廣濟縣南又東
逕德化縣北黃梅縣南彭蠡澤在德化縣東南九十
里其水北注于江北導江東迤北會于滙之所經也
江水至德化縣東北與贛水合彭蠡湖從南來注之
江水又東北逕湖口縣北又東北逕彭澤縣北其對
岸則宿松縣望江縣又東北逕東流縣西其對岸則
懷寧縣又東北逕貴池縣北其對岸則桐城縣又東
北逕銅陵縣西又東北逕繁昌縣北其對岸則無為
州又東北逕蕪湖縣西又北逕當塗縣西其對岸則
和州又東北逕江寧縣西其對岸則江浦縣又東北
逕上元縣北其對岸則六合縣又東逕句容縣北其
北岸則儀真縣又東逕丹徒縣北其北岸則江都縣
又東逕丹陽縣北又東逕武進縣北其北岸則泰州

又東逕江陰縣北其北岸則泰興縣靖江縣如皋縣
又東逕常熟縣北其北岸則通州又東逕太倉州北
其北岸則海門縣又東入于海此東為中江入于海
之所經也又曰漢志蒲氏道下云江水東南至江都
入海江都下云有江水祠海陵下云有江海會祠皆
以北岸言之江海會者謂江入海處也毘陵下云北
江在北東入海則以南岸言之今泰州泰興靖江如
皋通州漢時皆為海陵縣地今武進江陰常熟及太
倉頗海之鄉漢時皆為毘陵縣地故大江入海在其
境班氏所言初無參漏然北江若大江之正流也而
志與中江南江並列而為三使枝幹不分石城分江
水即南江之上源而松江在吳縣南若中江由陽羨
入海之道也志更以為南江使首尾橫決此則其所
短耳水經依導水之序先沔而後江沔水篇云與江
合流東過彭蠡澤又東北出居巢縣又東至石城縣
分為二其一過毘陵縣北為北江而不及江都蓋舉

其南而遺其北也江水篇叙至下雒縣北東陵鄉之東北而止以是應過九江至于東陵之文而不知此東陵非禹貢之東陵也自是以下則以為與沔水同故不復見然沔水篇但云過毘陵為北江而下文則專叙南江至餘姚入海無一言及于北江遂使志家有錯認北至山陰為浙江者貽誤不小按東樵之言亦非也世本江水篇缺軼下卷故中江入海之道遽湮耳予為採擷遺文補亡正繆欲為酈氏洗此沈寃長夜復旦或庶幾焉寰宇記舒州望江縣下引水經注云江水對雷水之北側有周瑜廟亦呼大雷神桐城縣下云益塘山在縣南一里漢書武帝紀元封五年巡狩過盛唐作樅陽盛唐之歌酈元注水經云此水源東南流逕盛唐成俗謂之小益唐雷水又名雷池水又云大雷池水西自宿松縣界流入自發源縣界東南積而為池謂之雷池又東流逕縣南去縣百里又東入于海江行百里為大雷口又有小雷口晉


庾亮報溫嶠書云足下無過雷池一步乃此地即注所云青林水又西南歷尋陽分為二一水東南流過大雷者也御覽引水經曰雷水南經大雷戍西注大江謂之大雷口一派東南流入江謂之小雷口也因學紀聞鮑明遠登大雷岸與妹書大雷在舒州望江縣水經注所謂大雷口也晉有大雷戍陳置大雷郡自注云積雨為池謂之雷池東入于江謂之大雷口名勝志桐城縣下引注水經曰樅陽湖水遶團亭與江水合而東流即此處也太湖縣下引水經注云晉泰始二年置縣在龍山太湖水邊水出縣西積稻山東南流入大江漢志廬江郡湖陵邑下云北湖在南全氏曰北湖即樅陽湖與丹陽郡溧陽縣之南湖隔江對岸初學記舒州引水經注云破虜磯東有趙屯城內有倉襄宇記和州歷陽縣下云洞口浦魏將曹休張遼伐吳至與吳軍相望注水經云江水左列洞口書叙指南云水經和州地名洞浦初學記和州引

水經注云江水北逕烏江縣之豐浦上通湖池又云
次得陰塘水同受皇后湖湖水連為包湖西翼潭湖
方輿紀要云和州烏江浦在故烏江縣東四里卽亭
長驤舟待項羽處水經注云江水又北得黃律口卽
烏江渡也章懷後漢書張禹傳注引水經注曰吳王
賜子胥死浮尸于江夫差悔與羣臣臨江設祭修塘
道及壇吳人因為立廟而祭焉按東漢揚州刺史治
歷陽今和州也周應合景定建康府志云白鷺州在
城之西酈道元水經云江寧之新林浦西對白鷺州
又曰曲水晉海西公于鍾山立流杯曲水延百僚水
經注曰舊樂遊苑宋元嘉十一年以其地為曲水武
帝引流轉酌賦詩方輿紀要常熟縣崑承湖水經注
云廣長各十八里文選江賦注引水經注曰中江東
南左會馮湖漢志丹陽郡溧陽縣應劭曰溧水所出
南湖也說文溧水出丹陽溧陽縣又有簞水亦出丹
陽建康府志云酈道元水經注朱湖在溧陽又云銀

林堰在溧水縣東南一百里即魯陽五堰也今蕪湖縣南有支江俗稱為縣河經縣市中東達黃池入三湖三湖升陽顧城石臼湖也至銀林而止所謂中江東至陽羨即此也蘓常承此下流常病漂沒故築銀林五堰以窒之自是中江不復東而宣歙皆由蕪湖西出達于大江濱湖之地皆隄為圩田中江亦漸隘狹故老云當時慮後人復開此道則蘓常之間必被水患遂以石窒五堰路又液鐵以固石故曰銀林今訛為林人云中江舊逕溧陽縣界古三江之一也今永陽江一名九陽江一名潁陽江在縣西北三十五里即其遺跡唐開元十七年蔣日用作本縣城隍記云此縣南歷中江風波不借舟楫無施縣宰喬翺創浮梁以便行旅中江橋梁之設昉于此景福三年楊行密將臺濠作五堰施輕舸饋糧是時中江置堰江流亦既狹矣東坡奏議云溧陽縣之西有五堰者古所以節宣歙金陵九陽江之衆水直趨太平州蕪湖

後之商人販賣鹽木東入二浙以五堰為阻因給官
中廢去五堰五堰既廢則宣歙金陵九陽江之水或
遇暴漲皆入宜興之荆溪由荆溪而入震澤時元祐
六年也是時中江尚通其後東壩既成中江遂不復
東惟永陽江水入荆溪漫著其詳以見漂陽亦禹跡
之所歷云明高淳韓邦憲作廣通壩考曰廣通鎮在
高淳縣東五十里世所謂五堰者也而有固城石臼
丹陽南湖受宣歙金陵姑孰廣德及大江水東連三
溶湖長蕩湖荆溪震澤中有三五里頗高阜春秋時
吳王闔廬伐楚用伍員計開渠以運糧今尚名胥溪
及傍有伍子山云左傳襄公三年楚子重伐吳克鳩
茲至于衡山哀公十五年楚子西子期伐吳及桐汭
蓋由此道鎮西有同城邑遺址則吳所以拒楚者也
自是湖流相通東南連兩浙西入大江舟行無阻矣
而漢唐以來言地理者遂以為水源本通蓋皆指吳
所開為禹貢三江故道耳中江之蛛絲馬跡見于羣

籍者如此人漢志丹陽郡宛陵縣下云彭澤聚在西
南清水西北至蕪湖入江在今寧國府界宣即清弋
江乎說大冷水出丹陽宛陵西北入江冷水疑即清
水也而應劭乃移而屬之零陵郡冷水縣下故臣攢
以為非也此水不見
于江水注為附記之



水經注釋卷三十五

欽定四庫全書

史部

水經注釋卷三十六至

詳校官監察御史

臣周元良

刑部郎中

臣許兆椿覆勘

總校官降調編修

臣倉聖脉

校對官編修

臣周與岳

謄錄監生

臣郭道藩

欽定四庫全書

水經注釋卷三十六

仁和趙一清撰

青衣水 桓水 若水 沫水

延江水 存水 溫水

青衣水出青衣縣西蒙山東與沫水合也

縣故古青衣羌國也竹書紀年梁惠成王十年瑕陽

人自秦導岷山青衣水來歸漢武帝天漢四年分沈

黎郡置西部都尉治青衣主漢民公孫述之有蜀也
青衣不服世祖嘉之建武十九年以為郡安帝延光
元年置蜀郡屬國都尉青衣王子心慕漢制上求內
附順帝陽嘉二年改曰漢嘉嘉得此良臣也縣有蒙
山青衣水所發東逕其縣與沫水會於越雋郡之靈
關道一清按此是漢嘉之靈關山非越雋郡之靈關道也道元蓋為經所誤詳沫水篇青衣
水又東叩水注之水出漢嘉嚴道叩來山東至蜀郡
臨叩縣東入青衣水

至犍為南安縣入于江

青衣水逕平鄉謂之平鄉江益州記曰平鄉江東逕蛾眉山在南安縣界去成都南千里然秋日清澄望見兩山相峙如蛾眉焉青衣水又東流注于大江

桓水出蜀郡岷山西南行羌中入于南海

尚書禹貢岷嶓既藝沱潛既道蔡蒙旅平和夷底績鄭元曰和上夷所居之地也和讀曰桓地理志曰桓水出蜀郡蜀山西南行羌中者也尚書又曰西傾因

桓是來馬融王肅云西治傾山唯因桓水是來言無

他道也余按經據書岷山西傾俱有桓水桓水出西

傾山更無別流所導者唯斯水耳

禹貢雖指曰古者桓有和音故鄭康

成破和為桓晉地道記云梁州自桓水以南為夷書所謂和夷底績此說是也但不當破和為桓耳又曰

漢志蜀郡下桓水別是一水行羌中入南海不復經中國班氏指為禹貢之桓水何其繆也酈道元云岷

山西傾俱有桓水此亦為班孔作調人耳依鄭說其所指者當為漢志之戕水唐之大渡河而謂此水即

西傾所因之桓水大非釋桓水者當以酈注所叙之白水為正浮於潛漢而達江沔

故晉地道記曰梁州南至桓水西底黑水東限扞關

今漢中巴郡汶山蜀郡漢嘉江陽朱提涪陵陰平廣漢新都梓潼犍為武都上庸魏興新城皆古梁州之地自桓水以南為夷書所謂和夷底績也然所可當者惟斯水與江耳桓水蓋二水之別名為兩江之通稱矣鄭元注尚書言織皮謂西戎之國也西傾雍州之山也雍戎二野之間人有事於京師者道當由此州而來桓是隴坂名其道盤桓旋曲而上故名曰桓是今其下民謂是坂曲為盤也斯乃元之別致恐乖

尚書因桓之義非浮潛入渭之文余考校諸書以具
聞見今略緝綜川流沿注之緒雖今古異容本其流
俗粗陳所由然自西傾至葭萌入于西漢即鄭元之
所謂潛水者也自西漢溯流而屆于晉壽界沮漾枝
津南歷岡穴迤邐而接漢沿此入漾書所謂浮潛而
逾沔矣歷漢川至南鄭縣屬于褒水溯褒暨于衙嶺
之南溪水支灌于斜川屆于武功而北達于渭水此
乃水陸之相關川流之所經復不乖禹貢入渭之宗

實符尚書亂河之義也

禹貢錐指曰酈元云自西漢

枝津即郭璞所云水從沔陽縣南流至漢壽沮洳枝津南所謂三泉故縣南大寒水西流者也歷岡穴迤邐而接漢岡穴即郭璞所謂峒山括地志所謂龍門山大石穴者也又曰水經注以褒斜二水為自沔入渭之道考諸漢史則猶有可疑者河渠書云武帝時有上書欲通褒斜道及漕事下御史大夫張湯湯問之言抵蜀從故道故道多阪回遠今穿褒斜道少阪近四百里而褒之水通沔斜水通渭皆可以行船漕漕從南陽上沔入褒褒絕水至斜間百餘里以車轉從斜下下渭如此漢中之穀可致山東從沔無限便于底柱之漕上以為然拜湯子卬為漢中守發數萬人作褒斜道五百餘里道果便近而水多湍石不可漕蘇氏據此以說經曰沔無入渭之道漢人所言褒斜則其道也然褒斜之閒絕水百餘里故曰逾于沔蓋禹

時通謂褒為沔也竊謂褒斜二水禹時必有相通之道如水經注所云衙嶺之南溪水支灌于斜川者及夏殷之際梁俗變為蠻夷貢賦不修貢道遂廢周武王牧野之師八國雖嘗來會其後巴蜀恃險復不與中國通逾沔入渭之道其誰知之嘗觀江河之支流日久亦多陸塞而沉深山窮谷之中溪流一線裁得通舟自禹至漢多歷年所豈能長存而不變褒斜二水相通之道禹時自有漢時自無不得據漢史而疑聖經亦不得據鄭注而疑漢史也

若水出蜀郡旄牛徼外東南至故關為若水也

山海經曰南海之內黑水之間有木名曰若木若水出焉又云灰野之山有樹焉青葉赤華厥名若木生

崑崙山西附西極也淮南子曰若木在建木西木有
十華其光照下地故屈原離騷天問曰羲和未陽若
華何光是也然若木之生非一所也黑水之閒厥木
所植水出其下故水受其稱焉若水沿流閒關蜀土
黃帝長子昌意德劣不足紹承大位降居斯水為諸
侯焉娶蜀山氏女生顓頊於若水之野有聖德二十
登帝位承少皞金官之政以水德膺歷矣若水東南
流鮮水注之一名州江大渡水出徼外至旄牛道南

流入于若水

一清按漢志蜀郡旄牛鮮水出徼外南入若水旄牛不曰道續志亦不曰道與

注異也

又逕越雋大柞縣入繩繩水出徼外山海經曰

巴遂之山繩水出焉東南流分為二水其一水枝流

東出逕廣柔縣東流注于江其一水南逕旄牛道至

大柞與若水合自下亦通謂之為繩水矣

一清按漢志越雋郡

遂久縣繩水出徼外東至樊道入江過郡二行千作

四百里說文从水作澠詳本篇樊道縣入江注中柞

夷也汶山曰夷南中曰昆彌蜀曰邛漢嘉越雋曰柞

皆夷種也

一清按禹貢雖指曰凡言柞者夷人於大江水上置藤橋謂之柞定柞大柞皆是近

水置笮橋處笮與苻同漢志越雋郡定
苻縣下云出鹽步北澤在南都尉治

南過越雋邛都縣西直南至會無縣淹水東南流注之

邛都縣漢武帝開邛苻置之縣陷為池今因名為邛

池南人謂之河

一清按漢志越雋邛都縣下云南山出銅有邛池澤范史西南夷傳云南

人以為邛河劉昭補註郡國志引南中志曰邛都縣東南數里有水名邛廣都河從廣三十里深百餘丈有魚長一二丈頭特大遙視如戴鐵釜狀河中有峯雋山有雋水言越此

水以章休盛也後復反叛元鼎六年漢兵自越雋水

伐之

一清按有雋水言越此水以章休盛說本應劭漢書音義然漢書西南夷傳又作粵雋粵與越

通猶百粵之為百越揚越之稱揚粵耳則越雋
二字相連仲瑗之說大抵附會道元引之非也以為

越雋郡治邛都縣王莽遣任貴為領戍大尹守之更
名為集雋也縣故邛都國也越雋水即繩若矣似隨
水地而更名矣又有溫水冬夏常熱其源可燂雞豚
下湯沐浴能治宿疾昔李驤敗李流於溫水是也若
水又逕會無縣縣有駿馬河水出縣東高山山有天
馬徑厥跡存焉馬日行千里民家馬牧之山下或產
駿駒言是天馬子河中有貝子胎銅以羊祠之則可

取也又有孫水焉水出臺高縣即臺登縣也孫水一

名白沙江南流逕邛都縣司馬相如定西南夷橋孫

水即是水也又南至會無入若水

一清按漢志越馬郡臺登縣孫水南

至會無入若行七百五十里

若水又南逕雲南郡之遂久縣蜻蛉

水入焉水出蜻蛉縣西東逕其縣下縣以氏焉有石

豬圻長谷中有石豬子母數千頭長老傳傳言夷昔

牧此一朝化為石迄今夷人不敢往牧貪水出焉蜻

蛉水又東注于繩水

一清按漢志注應劭曰蜻蛉水東入江

繩水又逕

三絳縣西又逕姑復縣北對三絳縣淹水注之三絳

一曰小會無故經曰淹至會無注若水

全氏曰按越雋原有會無

經之所指乃三絳縣故善長晰言之若水又與母血水合水出益州郡

弄棟縣東農山母血谷北流逕三絳縣南北入繩

清一

按漢志益州郡弄棟縣東農山母血水出北至三絳入繩行五百一十里繩水又東涂水

注之水出建寧郡之牧靡縣南山縣山並即草以立

名山在縣東北烏句山南五百里山生牧靡草可以

解毒百卉方盛烏多誤食烏喙中毒必急飛往牧靡

山咏收靡以解毒也

朱氏謀埤笺曰李奇曰收靡即升麻也

涂水導源

腦谷西北流至越雋入繩

一清按漢志益州郡收靡縣腦涂水所出西北至越

雋入繩過郡二行千二百里今本漢書落谷字當以水經注補之

繩水又逕越雋郡

之馬湖縣謂之馬湖江又左合卑水縣

一清按漢志越雋郡卑水

縣孟康曰音班劉昭郡國志補注卑水縣華陽國志云水通馬湖

而東流注馬湖江

也

一清按漢志越雋諸水皆與注合惟蘇永縣下云尼江在西北獨無可考耳

又東北至犍為朱提縣西瀘江水注之

朱提山名也應劭曰在縣西南縣以氏馬犍為屬國

也在郡南千八百許里建安二十年立朱提郡郡治縣故城郡西南二百里得所綰堂琅縣西北行上高山羊腸繩屈八十餘里或攀木而升或繩索相牽而上緣陟者若將階天故袁休明巴蜀志云高山嵯峨巖石磊落傾側縈迴下臨峭谷行者扳緣牽援繩索三蜀之人及南中諸郡以為至險有瀘津東去縣八十里水廣六七百步深十數丈多瘴氣鮮有行者晉明帝大寧二年李驤等侵越雋攻臺登縣寧州刺史

王遜遣將軍姚岳

一清按晉書王遜傳作姚崇

擊之戰於堂琅驤

軍大敗岳追之至瀘水赴水死者千餘人遜以岳等

不窮追怒甚髮上衝冠恰裂而卒案永昌郡有蘭倉

水出西南博南縣漢明帝永平十二年置

一清按郡國志是永

平二年置博南山名也縣以氏之其水東北流出博南山

漢武帝時通博南山道渡蘭倉津土地絕遠行者苦

之歌曰漢德廣開不賓渡博南越倉津渡蘭倉為作

人一清按作人猶役徒也而華陽國志作為佗人全祖望曰作即祚之省則為當讀去聲唐書張柬之

傳引此語作他人則仍華陽志也

山高四十里蘭倉水出金沙越人

收以為黃金又有珠光穴出光珠又有琥珀珊瑚

黃白青珠也蘭倉水又東北逕不韋縣與類水合水

出雋唐縣漢武帝置類水西南流曲折又北流東至

不韋縣注蘭倉水

一清按漢志益州郡雋唐縣類水西南至不韋行六百五十里

又

東與禁水合水自永昌縣而北逕其郡西水左右甚

饒犀象山有鈎蛇長七八丈尾末有岐蛇在山澗水

中以尾鈎岸上人牛食之此水傍瘴氣特惡氣中有

物不見其形其作有聲中木則折中人則害名曰鬼
彈惟十一月十二月差可渡正月至十月經之無不
害人故郡有罪人徙之禁傍不過十日皆死也禁水
又北注瀘津水又東逕不韋縣北而東北流兩岸皆
高山數百丈瀘峰最為傑秀孤高三千餘丈是山於
晉太康中崩震動郡邑水之左右馬步之徑裁通而
時有瘴氣三月四月經之必死非此時猶令人悶吐
五月以後行者差得無害故諸葛亮表言五月渡瀘

并日而食臣非不自惜也顧王業不可偏安於蜀故也益州記曰瀘水源出曲羅嶺下三百里曰瀘水兩峰有殺氣暑月舊不行故武侯以夏渡為艱瀘水又下合諸水而總其目焉故有瀘江之名矣自朱提至犍道有水步道有黑水羊官水至嶮難三津之阻行者苦之故俗為之語曰猶溪赤木盤蛇七曲盤羊鳥攏氣與天通看都護泚住柱呼伊庾降賈子左擔七里又有牛叩頭馬搏顙坂其艱嶮如此也

又東北至熨道縣入于江

若水至熨道縣又謂之馬湖江繩水瀘水孫水淹水
大渡水隨決入而納通稱是以諸書錄記羣水或言
入若又言注繩亦或言至熨道入江正是異水沿注
通為一津更無別川可以當之水有孝子石昔縣人
有隗叔通者性至孝為母汲江胥水天為出平石至
江胥中今猶謂之孝子石可謂至誠發中而休應自
天矣

沫水出廣柔徼外

縣有石紐鄉禹所生也今夷人共營之地方百里不敢居牧有罪逃野捕之者不逼能藏三年不為人得則共原之言大禹之神所祐之也

東南過旄牛縣北又東至越雋靈道縣出蒙山南

靈道縣一名靈關道

漢制夷狄曰道

禹貢雖指曰漢靈關道屬越雋

郡去此地甚遠今蘆山縣西北有靈關廢縣通典雅州蘆山縣有靈關山是也其地當為沫水之所經蓋漢後別置宋書符瑞志云晉咸寧三年黃龍見漢嘉靈關則縣屬漢嘉之靈關非越雋之靈關道也經注

並誤一清按靈史記作零家宇記雅州廬山縣下云
靈關鎮在縣北八十二里四向險峻控帶蕃蠻一夫
守之可以禦百蜀都賦云廓靈關而為門注云關為
西南漢嘉郡界也又云靈關山在縣北二十里峰嶺
嵯峨山聳十里傍夾大路下有山峽口濶三大長二
百步俗呼為重關通蠻貊之鄉入白狼夷之境是也

縣有銅山又有利慈渚晉太始九年黃龍二見于利

慈縣令董元之率吏民觀之以白刺史王濬濬表上

之晉朝改護龍縣也沫水出岷山西東流過漢嘉郡

南流衝一高山山上合下開水逕其間山即蒙山也

東北與青衣水合

華陽國記曰二水於漢嘉青衣縣東合為一川自下亦謂之為青衣水沫水又東逕開邦縣故平鄉也晉初置沫水又東逕臨邛南而東出于江原縣也

東入于江

昔沫水自蒙山至南安為涸崖水脈漂疾破害舟船歷代為患蜀郡太守李冰發卒鑿平涸崖河神顯怒冰乃操刀入水與神鬪遂平涸崖通正水路開處即冰所穿也

一清按涸崖即江水篇之熊耳峽也續志
提為郡南安縣有魚泣津劉昭補注曰蜀

都賦注曰魚符津數百步在縣北三十里縣臨大江岸便山嶺相連經益州郡有道廣四五尺深或百丈鑿鑿之迹今存昔唐蒙所造然則涸崖之聞為李冰始事而咸于唐蒙也范史吳漢傳章懷注引續志作魚涪津又曰魚鳧津寰宇記引南北八郡志云捷為有魚鳧津符涪鳧音同通用泣字誤也

延江水出捷為南廣縣又東至牂柯氍縣東屈北流

氍縣故捷為郡治也一清按兩漢晉宋諸志俱不云捷為郡治氍且氍屬牂柯已見

經文善長注自為立異何也縣有捷山晉建興元年置平夷郡縣

有氍水出氍邑西不狼山東與溫水合溫水一曰煖水出捷為符縣而南入黠水黠水亦出符縣南與溫

水會閼駟謂之閼水俱南入鼈水鼈水於其縣而東

注于延江水

全氏曰按漢志犍為郡符縣溫水南至鼈入黠水黠水亦南至鼈入江牂柯郡

鼈縣不狼山鼈水所出東入沅過郡二行七百三十里今以是注攷之蓋溫入黠黠入延延入沅以入江也說文溫水出涪南入黔水黔字誤當作延江水又黠然善長所引却不錯蓋流俗本之失也

與漢水合水出犍為漢陽道王莽之新通也山關谷

東至鼈邑入延江水也

一清按漢志犍為郡漢陽縣都尉治山關谷漢水所出東

至鼈入延漢陽不云是道續志之犍為屬國晉志之朱提郡下亦無道字漢志續志鼈是縣非邑也二縣

注並與史異

至巴郡涪陵縣注更始水

更始水即延江枝分之始也延江水北入涪陵水涪

陵水出縣東故巴郡之南鄙王莽更名巴亭魏武分

巴丘為涪陵郡

朱氏謀埤箋曰晉書地理志蜀置涪陵郡今云魏武分所未詳也全氏曰

晉志又云涪陵是劉璋置劉璋之末巴郡入于張魯魯降曹氏更入魏因置三巴見于魏書則亦或嘗立

涪陵郡未可知也張堪為縣會公孫述擊堪同心義

特史志不詳耳

士選習水者筏渡堪於小別江即此水也其水北至
枳縣入江更始水東入巴東之南浦縣其水注引瀆

水石門空岫陰深邃澗闇密傾崖上合恒有落勢行
旅避瘴將有遲之無不危心於其下又謂之西鄉水
亦謂之西鄉溪溪水閒關二百許里方得出山又通
波注遠復二百餘里東南入遷陵縣也

又東南至武陵酉陽縣入于酉水

武陵先賢傳曰潘京世長為郡主簿太守趙偉甚器
之問京貴郡何以名武陵京答曰鄙郡本名義陵在
辰陽縣界與夷相接數為所破光武時移治東山之

上遂爾易號傳曰止戈為武詩云高平曰陵於是名

馬

一清按劉昭補注郡國志曰前書本名武陵不知此對何所據而出

酉水北岸有黠

陽縣許慎曰溫水南入黠蓋鼈水以下津流沿注之
通稱也故縣受名焉西鄉溪口在遷陵縣故城上五
十里左合酉水酉水又東際其故城北又東逕酉陽
故縣南而東出也兩縣相去水道可四百許里於酉陽合也

酉水東南至沅陵縣入于沅

一清按酉水源流詳具沅水篇中而俗本

目錄作沅酉水已是不合所存於卷中者僅此經文而注無一字全氏曰此是延江水篇注中結語後人

又妄分之耳何焯亦云酉水入沅當附沅水篇但酉水出於充縣明見漢志而應劭于酉陽縣以為酉水所出蓋誤也善長云東逕酉陽則善矣蓋酉水自充縣至此始與延江水合也應劭又曰東入湘亦誤今經文既改隸而其目亦削去焉

存水出犍為郫郫縣

全氏曰按水經皆用東漢郫縣名獨郫郫不見于續志或者是和帝

以後所并作經時其縣尚在與天水隆處同一例也

王莽之孺郫也益州大姓雍闓反結壘於山繫馬柳

柱柱生成林今夷人名曰雍無梁林梁夷言馬也周

水自縣東南流逕牧靡縣北又東逕且蘭縣北而東

南出也

東南至鬱林定周縣為周水

周水又東逕牂柯郡之母斂縣北而東南與母斂水合矣水首受牂柯水東逕母斂縣為母斂水又東注于存水存水又東逕鬱林定周縣為周水蓋變名也

一清按漢志益州郡舊唐縣周水首受徼外又鬱林郡定周縣水首受母斂東入潭行七百里蓋自徼外合母斂水同入潭也

又東北至潭中縣注于潭

溫水出牂柯夜郎縣

縣故夜郎侯國一清按漢志應劭注作邑也唐蒙開以為縣王莽

名曰同亭矣溫水自縣西北流逕談藁與迷水合水

西出益州郡之銅瀨縣談虜山東逕談藁縣右注溫

水溫水又西逕昆澤縣南又逕味縣縣故滇國都也

諸葛亮討平南中劉禪建興元年分益州郡置建寧

郡於此一清按諸葛南征在建興三年不得有元年置郡事也元字誤當作三字水側皆

是高山山水之間悉是木耳夷居語言不同嗜欲亦

異雖曰山居土差平和而無瘴毒溫水又西南逕滇

池於縣西北池周三百許里上源深廣下流淺狹似

如倒流故曰滇池也

一清按漢志益州郡滇池縣滇池澤在西北有黑水祠長

老傳言池中有神馬家馬交之則生駿駒日行五百

里晉太元十四年寧州刺史費統言晉寧郡滇池縣

兩神馬一白一黑盤戲河水之上有滇州元封三年

立益州郡治滇池劉禪建寧郡治也溫水又西會大

澤

一清按漢志益州郡滇池縣大澤在西

與葉榆僕水合溫水又東南

逕牂柯之母單縣建興中劉禪割屬建寧郡橋水注

之水上承俞元之南池

一清按漢志益州郡俞元縣池在南橋水所出東至母單

入溫行千九百里縣治龍池州周四十七里一名河水

一清按漢

志益州郡勝休縣河水東至母撮入橋而善長以為即橋水之一名與邪龍分浦後立

河陽郡治河陽縣縣在河源州上又有雲平縣並在

州中橋水東流逕母單縣注于溫溫水又東南逕興

古郡之母撮縣東王莽更名有撮也與南橋水合水

出縣之橋山

一清按漢志益州郡母撮縣橋水首受橋山東至中留入潭過郡四行三千一

百二十里善長以為南橋蓋以別于俞元之橋也全氏曰按善長既加南字以別之矣然南橋水固河水之所入也又謂俞元之橋一名河東流梁水注之梁水則二橋互相出入矣恐有誤

水上承河水於俞元縣而東南逕興古之勝休縣王莽更名勝燹縣梁水又東逕毋掇縣左注橋水橋水又東注于溫溫水又東南逕律高縣南劉禪建興三年分牂柯置興古郡治宛溫縣晉書地道記治此溫水又東南逕梁水郡南溫水上合梁水故自下通得梁水之稱是以劉禪分興古之監南置郡于梁水縣

也一清按宋志梁水太守晉成帝分興古立梁水縣與郡俱立此云蜀置蓋東晉復立此郡也温

水又南逕鐔封縣北又逕來唯縣東而僕水右出焉
又東至鬱林廣鬱縣為鬱水

秦桂林郡也漢武帝元鼎六年更名鬱林郡王莽以
為鬱平郡矣應劭地理風俗記曰周禮鬱人掌裸
器凡祭醊賓客之祿事和鬱鬯以實樽彝鬱芳草也
百草之華煮以合釀黑黍以降神者也或說今鬱金
香是也一曰鬱人所貢因氏郡矣温水又東逕增食

縣有文象水注之其水導源牂柯句町縣應劭曰故

句町國也王莽以為從化文象水蒙水與盧唯水來

細水伐水並自縣東歷廣鬱至增食縣注于鬱水也

全氏曰漢志牂柯郡句町縣文象水東至增食入鬱
又有盧唯水來細水伐水而蒙水獨無稱又鬱林郡

下云有小谿水七并
行三千一百一十里

又東至領方縣東與斤南水合

全氏曰按斤南即漢志
之斤員宋祁曰一作斤

南者也經又別稱斤
江又曰員水者是

縣有朱厓水出臨塵縣東北流驩水注之水源上承

牂柯水東逕增食縣而下注朱厓水

一清按漢志鬱林郡增食縣驩

水首受牂柯東界入朱厓水行五百七十里

朱厓水又東北逕臨塵縣王

莽之監塵也縣有斤員水侵離水

全氏曰四十卷末作侵黎

並逕

臨塵東入領方縣流注鬱水

一清按漢志鬱林郡臨塵縣朱厓水入領方又

有斤員水又有侵離水行七百里領方縣斤員水入鬱

東北入于鬱

鬱水即夜郎豚水也

一清按漢志鬱林郡廣鬱縣鬱水首受夜郎豚水牂柯郡夜郎

縣豚水東至廣鬱然則鬱水非即豚水矣范史西南夷傳作邈水章懷注引前書地理志亦作邈水也

漢武帝時有竹王興于豚水有一女子浣于水濱有三節大竹流入女子足間推之不去聞有聲持歸破之得一男兒遂雄夷濮氏竹為姓所捐破竹於野成林今竹王祠竹林是也王嘗從人止大石上命作羹從者白無水王以劍擊石出水今竹王水是也後唐蒙開牂柯斬竹王首夷獠咸怨以竹王非血氣所生求為立嗣帝封三子為侯及死配父廟今竹王三郎祠其神也豚水東北流逕談藁縣東逕牂柯郡且蘭

縣謂之牂柯水水廣數里縣臨江上故且蘭侯國清

按漢志應劭注作邑也一名頭蘭牂柯郡治也楚將莊蹻沅

伐夜郎徑牂柯繫船因名且蘭為牂柯矣漢武帝元

鼎六年開王莽更名同亭有桂蒲闕牂柯亦江中兩

山名也左思吳都賦云吐浪牂柯者也元鼎五年武

帝伐南越發夜郎精兵下牂柯江同會番禺是也清

按漢志牂柯郡下應劭曰臨牂柯江也師古曰牂柯

係船牂也華陽國志曰楚頃襄王時遣莊蹻伐夜郎

軍至且蘭牂柯處乃改名為牂柯牂柯水又東

南逕母斂縣西母斂水出焉又東驩水出焉又逕鬱

林廣鬱縣為鬱水又東北逕領方縣北又東逕布山

縣北鬱林郡治也吳陸緒謂子績曰從今以後六十

年車同軌書同文

何氏曰據吳志此是績語未知鄭據何書且績父康裴注引謝承書

曰康字季寧拜廬江太守不名緒也至太康元年晉果平吳又逕中留

縣南與溫水合又東入阿林縣潭水注之水出武陵

郡鐔成縣玉山東流逕鬱林郡潭中縣周水自西南

來注之潭水又東南流與剛水合水西出牂柯母斂

縣王莽之有斂也東至潭中縣入潭

一清按此段注水道與存水注

合潭水又逕中留縣東阿林縣西右入鬱水

一清按漢志武

陵郡鐔成縣玉山潭水所出東至阿林入鬱過郡二行七百二十里

地理志曰橋水東

至中留入潭又云領方縣而有橋水余診其川流更

無殊津正是橋溫亂流故兼通稱作者咸言至中留

入潭潭水又得鬱之兼稱而字當為南南橋水也蓋

書字誤矣

全氏曰漢志橋水益州郡有二鬱林郡有一三橋水各為源流善長既以俞元之橋

混入母撥之橋茲又以母撥之橋混入領方之橋一清按漢志鬱林郡領方縣下云又有橋水是又字不

是而字亦是壻字从土不从木師古曰壻音橋善長
既混而一之而下文又出壻水則以萌渚壻為名何
也然則南橋水之名直是
繆詞豈所見有別本耶 鬱水右則留水注之水南

出布山縣下逕中留入潭

一清按漢志鬱林郡中留縣師古曰留音力救反水

名說文溜水出鬱林郡

潭水東逕阿林縣又東逕猛陵縣浪水

注之又東逕蒼梧廣信縣灘水注之鬱水又東封水

注之出臨賀郡馮乘縣西謝沐縣東界牛屯山亦謂

之臨水東南流逕萌渚壻西又東南左合壻水庾仲

初云水出萌渚壻南流入于臨臨水又逕臨賀縣東

又南至郡左會賀水水出東北興安縣西北有羅山
東南流逕興安縣西盛宏之荊州記云興安縣水邊
有平石上有石履言越王渡溪脫履於此賀水又西

南流至臨賀郡東右注臨水郡對二水之交會故郡

縣取名焉臨水又西南流逕郡南又西南逕封陽縣

東為封谿水故地理志曰縣在封水之陽

一清按此是應劭注

非班固原文

又西南流入廣信縣南流注于鬱水謂之封

谿水口者也

一清按續志交趾郡封谿縣建武十九年置劉昭補注引交州記曰有隄防龍

門水深百尋大魚登此門化成龍不得過曝鰓點額
血流此水恒如丹池有秦潛江出嘔山分為九十九
流三百餘里鬱水又東逕高要縣牢水注之水南出
共合一口

交州合浦郡

治合浦縣漢武帝元鼎六年平越所置

也王莽更名曰桓合縣曰桓亭孫權黃武七年改曰

珠官郡郡不產穀多採珠實前政煩苛珠徒交趾會

稽孟伯周為守有惠化去珠復還郡統臨允縣王莽

之大允也牢水自縣北流逕高要縣入于鬱水

一清按漢

志合浦郡臨允郡下云牢水北入鬱水南逕廣州南
高要入鬱過郡三行五百三十里

海郡西浪水出焉又南右納西隨三水

全氏曰按西隨三水即葉

榆水篇所謂西隨水過交趾分為五水至東界復為三水者也

又南逕四會浦水上

日日南郡盧容縣西古郎究浦內浦口馬援所漕水

東南屈曲通郎湖湖水承金山郎究究水北流左會

盧容壽泠二水盧容水出西南區粟城南高山而東

逕區粟城北又東右與壽泠水合水出壽泠縣界魏

正始九年林邑進侵至壽泠縣以為疆界即此縣也

壽泠縣以水湊故水得其名東逕區粟城南考古志

並無區粟之名應劭地理風俗記曰日南故秦象郡
漢武帝元鼎六年開日南郡治西捲縣林邑記曰城
去林邑步道四百餘里交州外域記曰從日南郡南
去到林邑國四百餘里準徑相符然則城故西捲縣
也地里志曰水入海有竹可為杖王莽更之曰日南
亭林邑記曰其城治二水之間三方際山南北瞰水
東西澗浦流湊城下城西折十角周圍六里一百七
十步東西度六百五十步塼城二丈上起塼牆一丈

開方澤孔塽上倚板板上五重層閣閣上架屋屋上
架樓高者樓七八丈下者五六丈城開十三門凡宮
殿南向屋宇二千一百餘間市居周繞岨峭地險林
邑故兵器戰具悉在區粟多城壘自林邑王范胡達
始秦餘徙民染同夷化日南舊風變易俱盡巢樓樹
宿負郭接山榛棘蒲薄騰林拂雲幽烟冥緬非生人
所安區粟建八尺表日影度南八寸自此影以南在
日之南故以名郡望北辰星落在天際日在北故開

北戶以向日此其大較也范泰古今善言曰日南張
重舉計入洛正旦大會明帝問日南郡北向視日也
重曰今郡有雲中金城者不必皆有其實日亦俱出
於東耳至于風氣暄暖日影仰當官民居止隨情面
向東西南北迴背無定人性凶悍果於戰鬪便山習
水不閑平地古人云五嶺者天地以隔內外況綿途
於海表顧九嶺而彌邈非復行路之逕岨影幽荒之
冥域者矣壽冷水自城西南與盧容水合東注郎究

究水所積下潭為湖謂之郎湖浦口有秦時象郡城
域猶存自湖南望外通壽冷從郎湖入四會浦元嘉
二十年以林邑頑凶歷代難化恃遠負衆慢威背德
北竇既臻南金闕貢乃命偏將與龍驤將軍交州刺
史檀和之陳兵日南修文服遠二十三年揚旌從四
會浦口入郎湖軍次區粟進逼圍城以飛梯雲橋懸
樓登壘鉦鼓大作虎士電怒風烈火揚城推衆陷斬
區粟王范扶龍首十五以上戮截無赦樓閣雨血填

尸成觀自四會南入得盧容浦口晉太康三年省日南郡屬國都尉以其所統盧容縣置日南郡及象林縣之故治晉書地道記曰郡去盧容浦口二百里故秦象郡象林縣治也永和五年征西桓溫遣督護滕峻率交廣兵伐范文於舊日南之盧容縣為文所敗即是處也退次九真更治兵文被創死子佛代立七年峻與交州刺史楊平復進軍壽泠浦入頓郎湖討佛于日南故治佛蟻聚連壘五十餘里峻平破之佛

逃竄川藪遣大帥面縛請罪軍門遣武士陳延勞佛
與盟而還康泰扶南記曰從林邑至日南盧容浦口
可二百餘里從口南發往扶南諸國常從此口出也
故林邑記曰盡紘滄之徼遠極流服之無外地濱滄
海衆國津逕鬱水南通壽冷即一浦也浦上承交阯
郡南都官塞浦林邑記曰浦通銅鼓外越安定黃岡
心口蓋藉度銅鼓即越駱也有銅鼓因得其名馬援
取其鼓以鑄銅馬至鑿口馬援所鑿內通九真浦陽

晉書地道記九德郡有浦陽縣交州記曰鑿南塘者
九真路之所經也去州五百里建武十九年馬援所

開林邑記曰外越紀粟望都

一清案此處似缺一字

紀粟出

浦陽渡便州至典由渡故縣至咸驩咸驩屬九真咸

驩已南麋鹿滿岡鳴咆命疇警嘯聒野孔雀飛翔蔽

日籠山渡治口至九德按晉書地道記有九德縣交

州外域記曰九德縣屬九真郡在郡之南與日南接

蠻盧舉居其地死子實綱代孫黨服從吳化定為九

德郡又為隸之林邑記曰九德九夷所極故以名郡
郡名所置周越裳氏之夷國周禮九夷遠極越裳白
雉象牙重九譯而來自九德通類口水源從西北遠

荒逕寧州界來也九德浦內逕越裳究九德究南陵

究按晉書地道記九德郡有南陵縣晉置也竺芝扶

南記山溪瀨中謂之究地理志曰郡有小水五十二

并行大川皆究之謂也

一清按漢志九真郡下云有小水五十二并八千五百六

十里林邑記曰義熙九年交趾太守杜慧度造九真水

日與林邑王范胡達戰擒斬胡達二子虜獲百餘人

胡達限

一清按此處有脫文蓋言胡達保險自固也

五月慧度自九真水

歷都粟浦復襲九真長圍跨山重柵斷浦驅象前鋒

接及城下連日交戰殺傷乃退地理志曰九真郡漢

武帝元鼎六年開治胥浦縣王莽更之曰驩成也晉

書地道記曰九真郡有松原縣林邑記曰松原以西

鳥獸馴良不知畏弓寡婦孤居散髮至老南移之嶺

岬不踰飯倉庾懷春於其北翡翠熙景乎其南雖嚶

謹接響城隔殊非獨步難遊俗姓塗分故也自南陵

究出于南界蠻進得橫山太和三年范文侵交州於

橫山分界度比景廟由門浦至古戰灣吳赤烏十一

年魏正始九年

全氏曰五字注中注

交州與林邑於灣大戰初

失區粟也渡盧容縣日南郡之屬縣也自盧容縣至

無變越烽火至比景縣日中頭上影當身下與影為

比如淳曰故以比影名縣關駟曰比讀蔭庇之庇影

在已下言為身所庇也

全氏曰吳仁傑曰考古編云舊唐志景州北景縣晉將灌

遂破林邑五月五日即其地立表表在北日景在南故郡名日南縣為北景按唐命太史往安南測日景亦云然然王充謂從日南還者問之云不盡然蓋惟五月日影在南常時則不然也按水經比景縣音訛影言影為身所訛此爾雅所謂距齊州以南戴日者也宋書州郡志亦作北景蓋後來傳習成訛立為異義耳斗南以比景為北景豈所見前後漢志有別本與

林邑記曰度比景至朱

吾朱吾縣浦今之封界朱吾以南有文狼人野居無

室宅依樹止宿食生魚肉採香為業與人交市若上

皇之民矣縣南有文狼究下流逕通晉書地道記曰

朱吾縣屬日南郡去郡二百里此縣民漢時不堪二

千石長吏調求引屈都乾為國林邑記曰屈都夷也
朱吾浦內通無勞湖無勞究水通壽冷浦元嘉元年
交州刺史阮彌之征林邑楊邁出婚不在奮威將軍
阮謙之領七千人先襲區東以過四會未入壽冷三
日三夜無頓止處凝海直岸遇風大敗楊邁攜婚都
部伍三百許船來相救援謙之遭風餘數船艦夜於
壽冷浦裏相遇閭中大戰謙之手射楊邁拖工船敗
縱橫崑崙單舸接得楊邁謙之以風溺之餘制勝理

難自此還渡壽冷至溫公浦升平二年溫放之征范
佛於灣分界陰陽圻入新羅灣至馬下一名阿賁浦
入彭龍灣隱避風波卽林邑之海渚元嘉二十三年
交州刺史檀和之破區粟已飛旌蓋海將指典沖於
彭龍灣上鬼塔與林邑大戰還渡典沖林邑入浦令
軍大進持重故也浦西卽林邑都也治典沖去海岸
四十里處荒流之徼表國越裳之疆南秦漢象郡之
象林縣也東濱滄海西際徐狼南接扶南連九德

後去象林林邑之號建國起自漢末初平之亂人懷

異心象林功曹姓區有子名連

一清按梁書作達

攻其縣殺

令自號為王值世亂離林邑遂立後乃襲代傳位子

孫三國鼎爭未有所附吳有交土與之鄰接進侵壽

冷以為疆界自區連以後國無文史失其纂代世數

難詳宗允滅絕無復種裔外孫范熊代立人情樂推

後熊死子逸立有范文日南西捲縣夷帥稚家奴也

文為奴時山澗牧羊於澗水中得兩鱧魚隱藏挾歸

規欲私食卽知檢求文大慙懼起託云將礪石還非
為魚也卽至魚所見是兩石信之而去文始異之石
有鐵文入山中就石冶鍊鍛作兩刀舉及向郭因祝
曰鱧魚變化冶石成刀斫石郭破者是有神靈文當
治此為國君王所不入者是刀無神靈進斫石郭如
龍淵干將之斬蘆藁由是人情漸附今斫石尚在魚
刀猶存傳國子孫如斬蛇之劍也稚嘗使文遠行商
賈北到上國多所聞見以晉愍帝建興中南至林邑

教王范逸制造城池繕治戎甲經始廓略王愛信之
使為將帥能得衆心文纔王諸子或徙或奔王乃獨
立成帝咸和六年死無允嗣文迎王子於外國海行
取水置毒椰子中飲而殺之遂脅國人自立為王取
前王妻妾置高樓上有從已者取而納之不從已者
絕其飲食乃死江東舊事云范文本揚州人少被掠
為奴賣墮交州年十五六遇罪當得杖畏怖因逃隨
林邑賈人渡海遠去没入于王大被幸愛經十餘年

王死文害王二子詐殺侯將自立為王威加諸國

清一

按通鑑晉紀成帝咸康二年初日南夷帥范雅有奴曰范文後至林邑林邑王范逸愛信之是歲逸卒文詐迎逸子于他國置毒于椰酒而殺之文自立為王于是出兵攻大岐界小岐界式僕徐狼屈都乾魯扶南等國皆滅之篇中所紀諸地名或夷推蠻語口食皆夷王國也屈都徐狼並見前

鼻飲或雕面鏤身脫衣裸種漢魏流赭

一清按漢書刑法志云赭

衣塞路蓋罪人之服注云流赭謂徙人也咸為其用建元二年攻日南九

德九真百姓奔迸千里無烟乃還林邑林邑西去廣

州二千五百里城西南角高山長嶺連接天郭嶺北

接澗大源淮水出船船遠界三重長州隱山遶西曲
街迴北其嶺南開澗小源淮水出松根界上山壑流
隱山繞南曲街迴東合淮流以注典沖其城西南際
山東北瞰水重塹流浦周繞城下東南塹外因傍薄
城東西橫長南北縱狹北邊兩端迴折曲入城周圍
八里一百步塹城二丈上起塹牆一丈開方隙孔塹
上倚板板上層閣閣上架屋屋上構樓高者六七丈
下者四五丈飛觀鵠尾迎風拂雲綠山瞰水騫翥冕

寧但制造壯拙稽古夷俗城開四門東為前門當兩
淮渚濱於曲路有古碑夷書銘讚前王胡達之德西
門當兩重塹北迴上山山西即淮流也南門度兩重
塹對溫公壘升平二年交州刺史溫放之殺交趾太
守杜寶別駕阮朗遂征林邑水陸累戰佛保城自守
重求請服聽之今林邑東城南五里有溫公二壘是
也北門濱淮路斷不通城內小城周圍三百二十步
合堂瓦殿南壁不開兩頭長屋脊出南北南擬背曰

西區域內石山順淮面陽開東向殿飛檐鵲尾青環
丹墀椽題角椽多諸古法閣殿上柱高城丈餘五牛
屎為塗牆壁青光迴度曲掖綺牖紫牕椒房嬪媵無
別宮觀路寢永巷共在殿上臨踞東軒逕與下語子
弟臣侍皆不得上屋有五十餘丘連薨接棟檐宇如
承神祠鬼塔小大八廟層臺重榭狀似佛刹郭無市
里邑寡人居海岸蕭條非生民所處而首渠以安養
國家十世豈久存哉元嘉中檀和之征林邑其王楊

邁舉國夜奔竄山藪據其城邑收寶巨億軍還之後
楊邁歸國家國荒殄時人靡存踣踣憤絕復蘇
即以元嘉二十三年死初楊邁母懷身夢人鋪楊邁
金席與其兒落席上金光色起昭晰艷耀華俗謂上
金為紫磨金夷俗謂上金為楊邁金父胡達死襲王
位能得人情自以靈夢為國祥慶其太子初名咄後
楊邁死咄年十九代立慕先君之德復改名楊邁昭
穆二世父子共名知林邑之將亡矣其城隍塹之外

林棘荒蔓榛梗冥鬱藤盤篁秀參錯際天其中香桂
成林氣清烟澄桂父縣人也棲居此林服桂得道時
禽異羽翔集間闕兼比異鳥不比不飛鳥名歸飛鳴
聲自呼此戀鄉之思孔悲桑梓之敬成俗也豫章俞
益期性氣剛直不下曲俗容身無所遠適在南與韓
康伯書曰惟檳榔樹最南遊之可觀但性不耐霜不
得北植不遇長者之目令人恨深嘗對飛鳥戀土增
思寄意謂此鳥其背青其腹赤丹心外露鳴情未達

終日歸飛飛不十千路餘萬里何由歸哉九真太守
任延始教耕犁俗化交土風行象林知耕以來六百
餘年火耨耕藝法與華同名白田種白穀七月火作
十月登熟名赤田種赤穀十二月作四月登熟所謂
兩熟之稻也至于草甲萌芽穀月代種種耜早晚無
月不秀耕耘功重收穫利輕熟速故也米不外散恒
為豐國桑蠶年八熟繭三都賦所謂八蠶之綿者矣
其小水崖羃歷常吐飛溜或雪霏沙漲清寒無底分

溪別壑津濟相通其水自城東北角流水上懸起高
橋渡淮北岸即彭龍區粟之通達也檀和之東橋大
戰楊邁被創落象即是處也其水又東南逕船官口
船官川源徐狼外夷皆裸身男以竹筒掩體女以樹
葉蔽形外名狼臙所謂裸國者也雖習俗裸袒猶耻
無蔽惟依暝夜與人交市閭中龔金便知好惡明朝
曉看皆如其言自此外行得至扶南按竺芝扶南記
曰扶南去林邑四千里水步道通檀和之令軍入邑

浦據船官口城六里者也自船官下注大浦之東湖
大水連行潮上西流潮水日夜長七八尺從此以西
朔望并潮一上七日水長丈六七七日之後日夜分
為再潮水長一二尺春夏秋冬厲然一定高下定度
水無盈縮是曰海運亦曰象水也又兼象浦之名晉
功臣表所謂金潏清逕象渚澄源者也其川浦渚有
水蟲彌微攢木食船數十日壞源潭湛瀨有鱗魚色
黑身五丈頭如馬首伺人入水便來為害山海經曰

離耳國雕題國皆在鬱水南林邑記曰漢置九郡儋

耳預焉

一清按九郡謂南海蒼梧鬱林合浦交趾九真日南暨儋耳朱崖而為九儋耳朱崖既罷

故地理志列七郡之目也

民好徒跣耳廣垂以為飾雖男女褻露

不以為羞暑褻薄日自使人黑積習成常以黑為美

離騷所謂元國矣然則儋耳即離耳也王氏交廣春

秋曰朱崖儋耳二郡與交州俱開皆漢武帝所置大

海中南極之外對合浦徐聞縣清朗無風之日逕望

朱崖州如困廩大從徐聞對渡北風舉帆一日一夜

而至周迴二千餘里徑度八百里人民可十萬餘家
皆殊種異類被髮雕身而女多姣好白皙長髮美鬢
犬羊相聚不服德教儋耳先廢朱崖數叛元帝以賈
捐之議罷郡楊氏南裔異物志曰儋耳朱崖俱在清

按下有脫文應劭張晏皆云在大海中也臣瓚曰茂
陵書珠崖治暉都去長安七千三百一十四里儋耳
去長安七千三百分為東蕃故山海經曰在鬱水南
六十八里領縣五

也鬱水又南自壽冷縣注于海昔馬文淵積石為塘
達于象浦建金標為南極之界俞益期牋曰馬文淵

立兩銅柱于林邑岸北有遺兵十餘家不反居壽冷
岸南而對銅柱悉姓馬自婚姻今有二百戶交州以
其流寓號曰馬流言語飲食尚與華同山川移易銅
柱今復在海中正賴此民以識故處也林邑記建武
十九年馬援樹兩銅柱于象林南界與西屠國分漢
之南疆也土人以其流寓號曰馬流世稱漢子孫也
山海經曰鬱水出象郡而東南注南海入須陵東南

者也

一清按漢志鬱林郡廣鬱縣鬱水東至四會入海過郡四行四千三百里應劭曰鬱

水出廣信東入海言始或可終則非矣

水經注釋卷三十六